

iuge dit il qui ue corrige le pecheur luy commande a pechier. et pourroiet bien tant souffrir les iuges que les malfaicteurs enchaiferoiet leurs souuerains et eulx hors du pays. Mais or posons que tu ayes licēce de toy vēgier. ie dy que tu nas pas la puissance quāt a present. Car se tu veulx faire cōparoyson de ta puissance a la puissance de tes aduersaires tu trouueras trop de choses selō ce que ie t'ay monstre dessus. Et pource ie dy quil est bon quant a maintenāt toy souffrir et auoir paciēce. Apres tu sces que lon dit comunemēt que contēdre a plus fort est enragier. contēdre a esgal est peril. contēdre a moïdre est honte. Et pource lon doit fuir tout contēt tāt comme lon peult. Car salomon dit quil est grāt honneur a hōme qui se scet iecter de brige et de contēs. Et se plus fort de toy te griefue studie toy plus en lappaisier que en toy vēgier. Car senecque dit. Celuy se met en grāt peril qui se courouce a plus fort de luy. Et cathon dit. Se plus fort de toy te griefue studie toy plus en lappaisier que en toy vēgier. Et pource se plus fort de toy te griefue seuffre toy. car celuy q ta vne foys greue ne te pourra vne aultre foys aidier.

**O**R posons que tu ayes licēce et puissance de toy vengier ie dy encores q sont moult de choses qui ten doiuent retraire. Et premieremēt se tu veulx cōsiderer les deffaulx qui sont en toy pour lesquels dieu a voulu souffrir que ceste tribulacion te soit aduenue selon ce que iay dit dessus. Car le poete dit que nous deuons porter en paciēce les tribulacions qui nous vienent quāt nous pensons que nous les auons biē desseruies. Et saint gregore dit que quāt vngchascun considere biē le grāt nombre de ses deffaulx et de ses pechies les peines et les tribulacions quil seuffre luy apparēt plus petites. et de tāt comme ses pechies luy semblent plus grās de tant sa peine luy semble pi<sup>9</sup> legiere. Apres moult te doit encliner a paciēce la paciēce de nostre seigneur Jesucrist selō ce q dit saint pierre en ses espitres. Jesucrist dist il a souffert pour nous et a donne exēple a vngchascun de lenuyure. car il ne fit oncques pechie ne oncques de sa bouche ne yffit vne villennie. Apres moult te doit encliner a paciēce la paciēce des saintes qui sont en paradis qui ont eu si grant paciēce es tribulacions quilz ont souffertes sans leur coulpe. Apres moult te doit encliner a paciēce ce que les tribulacions de ce monde durent trespetit de tēps et sont tantost passees. et la gloire que lon acquiert par auoir paciēce es tribulaciōs est pardurable selon ce q lapostre dit en lespitre secunde a ceulx de corinthe. Apres tien formēt q cil nest pas biē enseignez qui ne scet auoir paciēce